

五言詩


1060.87

36

17

黃岡縣志卷之二十

知黃岡縣事宛平俞昌列



藝文志

詩賦

天下景會於心情感於物則往往發於有韻之文詩賦是也而景不足以動心情不足以起物則猶湮鬱而不彰於是又在地與人兼勝焉竹樓雪堂標領江山風月登焉覽焉忽不自知其意之何以遠而興之何以飛也況乎英哲踵生賢豪萃聚相與沐浴清化鼓吹休明而羈臣逸老之悲吟又或以時會激楚於其間此其澹雅

黃岡縣志

卷之三

詩

一

之音與夫幽豔之作所以斯愛斯傳軼於他州者也因次古文而並廢之續之

賦

宋

前赤壁賦

蘇軾

壬戌之秋七月既望蘇子與客泛舟遊於赤壁之下清風徐來水波不興舉酒屬客誦明月之詩歌窈窕之章少焉月出於東山之上徘徊於斗牛之間白露橫江光接天縱一葦之所如凌萬頃之茫然浩浩乎如馮虛御風而不知其所止飄飄乎如遺世獨立羽化而登仙於是飲酒樂甚扣舷而歌

之歌曰桂棹兮蘭橈擊空明兮泝流光渺渺兮予懷望美人
兮天一方客有吹洞簫者倚歌而和之其聲嗚嗚然如怨如
慕如泣如訴餘音嫋嫋不絕如縷舞幽壑之潛蛟泣孤舟之
嫠婦蘇子愀然正襟危坐而問客曰何爲其然也客曰月明
星稀烏鵲南飛此非曹孟德之詩乎西望夏口東望武昌山
川相繆鬱乎蒼蒼此非孟德之困於周郎者乎方其破荊州
下江陵順流而東也舳艫千里旌旗蔽空醜酒臨江橫槊賦
詩固一世之雄也而今安在哉况吾與子漁樵於江渚之上
侶魚鰕而友麋鹿駕一葉之扁舟舉匏尊以相屬寄蜉蝣於
天地渺滄海之一粟哀吾生之須臾羨長江之無窮挾飛仙

黃岡縣志

卷之二十

詩

二

以遨遊抱明月而長終知不可乎驟得託遺響於悲風蘇子
曰客亦知夫水與月乎逝者如斯而未嘗往也盈虛者如彼
而卒莫消長也蓋將自其變者而觀之則天地曾不能以一
瞬自其不變者而觀之則物與我皆無盡也而又何羨乎且
夫天地之間物各有主苟非吾之所有雖一毫而莫取惟江
上之清風與山間之明月耳得之而爲聲目遇之而成色取
之無禁用之不竭是造物者之無盡藏也而吾與子之所共
適客喜而笑洗盞更酌肴核既盡杯盤狼藉相與枕藉乎舟
中不知東方之既白

後赤壁賦

蘇軾

是歲十月之望步自雪堂將歸於臨臯二客從予過黃泥之
阪霜露既降水葉盡脫人影在地仰見明月顧而樂之行歌
相答已而歎曰有客無酒有酒無肴月白風清如此良夜何
客曰今者薄暮舉網得魚巨口細鱗狀如松江之鱸顧安所
得酒乎歸而謀諸婦婦曰我有斗酒藏之久矣以待子不時
之需於是攜酒與魚復遊於赤壁之下江流有聲斷岸千尺
山高月小水落石出曾日月之幾何而江山不可復識矣予
乃攝衣而上履巉巖披蒙茸踞虎豹登虬龍攀栖鵲之危巢
俯馮夷之幽宮蓋二客不能從焉劃然長嘯草木震動山鳴
谷應風起水涌予亦悄然悲肅然而恐凜乎其不可留也

反而登舟放乎中流聽其所止而休焉時夜將半四顧寂寥
適有孤鶴橫江東來翅如車輪元裳縞衣戛然長鳴掠予舟
而西也須臾客去予亦就睡夢一道士羽衣翩躚過臨臯之
下揖予而言曰赤壁之遊樂乎問其姓名俛而不答嗚呼噫
嘻我知之矣疇昔之夜飛鳴而過我者非子也耶道士顧笑
予亦驚寤開戶視之不見其處

柯山賦

張耒

入東門而右回兮原迤靡以相屬拔磅礴以隆起兮是爲柯
山之麓其上蕭森而晄靄兮冠萬竿之修竹下磽礧而堅密
兮拱高林與喬木散雞犬於危阨兮雜茅茨與夏屋通樵漁

之溪遂兮路從橫而斷續狼土石裂暗竇谷虛鳴鳥上下伏
獸號呼俯江流之蕩瀾招裂山之盤紆林巒作態而蔽虧兮
風雲效技而卷舒固可以開闔陰陽於一氣賓賤日月於天
衢爰有窮人瞿然無歸曠四海無所投其足兮古帝命我於
幽之隈庇蓬茅之數椽兮撫枵腹而常飢時醉飽而自得兮
亦杖履而遨嬉逾山而東席門草藩爰有君子於茲考槃自
種自食鄰里莫干圖書滿家兒稚飢寒相見輒喜有時不冠
寄萬事於一笑兮不知食糲而衣單吾不加物以一毫兮亦
莫愛人煥寒悟紛華之多虞兮幸寂寞之至安飲我薄酒歡
有餘啜我豆羹甘而腴隱几而休讀我書乃曳杖歌曰升柯
黃岡縣志

卷之二十

詩

四

之巔明遠眺兮築我之庵可以老兮終古不忒天之道兮于
于而行無喪吾寶兮

游東湖賦

張耒

紛不知吾之所加兮獨漫漫而若狂乘醉飽之餘力兮遂
巘而緣岡惟嚴冬之栗烈兮莽川澤之茫茫農功休乎場圃
兮平陸散夫牛羊憫大木之百圍兮慘赤立而無裳鶴鶴羣
鳴而下上兮雜篁竹之青黃忽乎陸之旣窮兮漸積水之汪
洋曰是爲齊安之東湖兮右派合乎濤江荒灣寂寥而葭葦
兮懸流曾乎夕切爲舉綱而無獲兮嘉魚逝而洋洋弔林落
之柴荆兮哀淮夷之阻荒呼徒侶吾還歸兮陰風振而塵揚

畏星昴之將中兮冒元夜之飛霜顧謂童子汝其賦詩爰有
小子褒然致詞歌曰歲窮木落兮大澤空鴈宵征兮天北風
曷不飲酒兮御元冬歸來歸來兮樂未終余曰汝姑置之乃
歌曰臨山川兮懷故鄉歲窮陰兮晝不暘升高堂兮潔余樽
耿余思兮古之人

明

放龜賦

有序

李夢陽

畜有二龜李坪驛俯長江之流目發育之溶溶恒然有傷
於二物復思趙抃放龜事千載同懷爰放二龜於汀潭已
作斯賦比興諸義聊抒鬱志非諷一而勸百者擬也論兒

黃岡縣志

卷之三十

詩

五

子亦作

精網緼以游魂兮各含和而構形何茲物之詭異兮獨神超
而蘊靈準麟鳳之隱見兮呼吸陰陽而卷舒善伸縮以遠患
兮匹神龍而水居嘆賦命之多蹇兮遇置網而見執衆君子
之珍視兮戒航舟而並畜仁人細弗棄兮迺伊欽余之素質
曰離籠豈林游若兮爰偉賢哲而用情譬機羈之願脫兮慮
曳尾及而遲暮俯洪流以余縱兮瞪長江而徑步歌曰醜混
混以流形兮就厥龜而副嘉外負介以昭武兮內文柔而靜
遐體穹窿以則乾兮履坤方而祛隱鄙饜饜之諛世兮寧吞
浮而歛息沐澄冷以棲寂兮戢潭荷而保身文于列以布象

兮色蒼古而玢璘景至人之赴義兮將刳中以茲誠怨穆卜
之靡諧兮懼捐軀而莫明賡歌曰江滔滔以東下兮蕤葭莽
而波濤幸已縻而終逝兮劃順泛而長逃念曩昔以中暢兮
數惟拘縱之所殊思范楫以依徙兮願附孔而海浮烏故林
以悲鳴兮歎躑躅於前邱軫宿叅以迴透兮躍潏溟而涕流
亂曰聖欽元龜戒朶頤兮十朋四靈榮以時兮淵潛罔湧出
斯縻兮求仁見夢厥無惑兮刳腸灼蠟爰奚益兮謚兮龐兮
齊天地徜徉兮

擬赤壁賦 有序

茅瑞徵

余向不作賦既量移齊安友人溫太史長卿書來道訊曰

黃岡縣志

卷之三

詩

六

黃州赤壁盛傳坡老兩作此自記體子令斯邑直須作賦
余竊心許竟逡巡未遑也會歲丁未直指史公按部之暇
原本山川以賦見屬茲乃不辭固陋僭爲抽毫坡老可作
應嗤貂續

歷皇輿以遐矚循南紀而騁武爰按轡以澄清乃周星而閱
楚旣縱目乎山椒遂弭節於江滸惟茲山之鬱盤標奇蹤兮
終古夫其擁帶長薄苞舉層巒靈根競爽秀色堪餐象朝霞
之軒舉雜落英而流丹盼赭岸於天末縈蘭渚之疑紈信山
川其殊詭有今古騷人墨士之所怳忽而貽愕者矣若乃跨
江潯眺漢汭選芳洲馮遠滋山如簪樹若薺遡樊浦之歸雲

阻三江於東逝望鄂渚兮中流辨西山兮新霽夫何形勢之
截辭以崔嵬枕長江而作蔽爾其繡薨栖鴛崇墉列雉聽鼓
角於嚴更拱金湯於西顧千門晨啟排闥闔而生雲萬竈宵
凝捲簾權而舒霧面波濤之澎湃以下上兮大別注之滙彭
蠡而張怒亦有征檣橫霧而突進兮想舳艫之爭馳杖尺筆
而飛渡至若軒楹顯殿以前闕亭榭紛披以層布施樓百尺
兮星臨雕檻三重兮某時枕流漱石旣天劃而神鏤左江右
湖亦龍驤而虎視此固夫震旦之仙都方隅之偉觀也當夫
天氣肅零露瀼龍火頽兔華上晚風清綺席張理瑤琴騰鬱
蒼饒庾公之佳興同蘇子而徜徉則有漁燈佛火兩兩相望

蘭槩桂檝傾彼壺觴引金樽而邀月弄涼夜之逸光亦有聲
犯龜茲韻寫滄浪紫裘腰笛一曲徬徨鶴南飛兮歌裂石鶴
遶樹兮夜何長爾乃感雄圖之延促徵往牒之興亡館橫江
兮創監洲得勝兮垂芳彼蒯恩旣嘗吞吳而卻敵暨劉冠軍
之破桓元獨崢嶸於此方是皆號最勝之遺蹟又何空齒乎
東風折戟之周郎爰有問鶴之亭放龜之渚留遺惠於千秋
訪飛仙而儻止悟身名之浮漚而露電兮繫獨三不朽之流
傳歷劫灰而可譜而亦誌夫磯頭之金甲兮并綆寒碧血剖
竟矯矯乎潤英聲於鼎釜乃若抽彩毫之五色愴往事而搗
詞粵有李白之韻杜牧之詩夫實超兩賦以前步兮官商沉

振而互馳至於肇嘉名顯榛蕪定雄飛訂史圖吾又孰測當年之故物兮茲磊磊而懸崖夸厥土之赤墳蓋嘗錯楚方而可數寧止連雲夢而爲三抑亦沿郢沔而稱五彼聲名之奪朱徒赭堊乎凝質的歷丹邱目遇成色尙有霍州之南焉獨嘉魚之北物換星移沙青渚白目送手揮天空海闊勝以時顯地因人傑是耶非耶山川罔識吾將挾以問之寥廓竟嗒然而失答

讀書鐙檠賦

有序

王一翥

王子終夜讀書寶一鐙檠婦曰苟富貴毋相忘遂爲賦之爾其爲器也閤而能納盈而徐沖卷舒惟時萬戶其同燭龍

黃岡縣志

卷之三

詩

八

匿景蟾兔臃臃自非嘉德孰補昏蒙或照錦幕或耀朱櫳伴愁助笑提攜不窮相其體鑿製自良工如金如錫以錯以襲莖擢蘭膏燄吐玉蟲繚青縈白圍暈旁通佳人是告以筮吉凶孰若佐讀晤晤相從槐燧初鑽松寮始烘葦屏竹舍苦雨老風漁燈如星佛火如虹室少木奴案乏青童丹黃丙夜形影孤蓬守此陶甕陋彼銅虹首推素侶實爲厥功嗟彼酣嬉舊業罔攻椒煙登進草籌蒙戎折耳敗足委棄壁龍我則安敢夙夜靖共照徹汗青以及女紅高炬熒熒浴爾始終

國朝

赤鼻山賦

胡復亨

嶽鎮巍聳兮維天柱之高撐支條蜿蜒兮繫地氣之周旋騁
足千里兮蹶起於西陵穿身百雉兮首出乎邾城羗盤礴於
水曲寶苞育夫火精乃厥土之赤埴又其石如紫金儼丹沙
之爲骨類臙脂之染形雨頻洗而彌耀日常暴以愈新撼颺
風之勁疾無改麗質激怒浪之養蓄益試堅貞顧造化之肖
物偏近取諸人身異焉哉髣髴古之隆準妙矣乎肇錫予以
嘉名儷黃岡之舊號受赤鼻之殊稱方其胎息聚寶兮纍纍
數指上之螺紋角立剪峰兮稜稜樹額間之崢嶸蘼蕪芽茁
兮延蔓似趺坐於綠茵峩眉冰融兮驟漲如渴飲於黃泓旣
植體之特絕復景物之競呈則有水落而平原出牛馬牧兮

黃岡縣志

卷之三

詩

九

錯錦霜降而旅鴈呼颿糴過而乍驚脆以薄兮湖上之芰菱
縱橫解以脫兮窩中之菊英纒紛宛委定惠之院海棠綽約
而春榮需衍橫江之館絲柳搖曳而秋青經時則熟地滿雪
藕之白蓮應候而肥潛泳玉脂之鯉鱗况夫諸川環合羣湖
洄灤沙巴南亘兮澄澄荻洲北擁兮汀汀右控三江之土游
左漏微泉於下清澗轉溪回瀝玻璃於衣帶葦航葉駕接西
巘於門庭寒溪隱見兮仲謀避暑之離宮杯湖淨滌兮次山
杯飲之宸尊凡盡態而鬪妍俱呈技以效命猶且脛踏毛寶
之龜渚肘挾張耒之鴻軒玩月波之佳趣想見浩浩睹竹樓
之巧制如聞丁丁摹木石於壁間寒耶何氏之堂得江山於

几席快哉張子之亭若夫前賢之輝映則魏公之與禹偁幽
人之黜綴則季常以及大臨於時草昧欲開天作奇緣氣機
感召帝遣偉人才蹴趾於虎豹遂濯纓於滄淪攀危巢而長
嘯放扁舟而酣吟因裁成夫兩賦兼吁嗟以千言假苑枯之
已往抒已心之不平約畧大夫之懷沙大都太傅之過秦旣
風流之駘宕尤意致之超騫悲夔契之莫用託莊列之幻行
學嵇阮之曠達笑魏吳之閒爭栩栩羽衣之翩翩渺渺孤鶴
之飛鳴固將神遊於十洲揮斤於八紘夫何絕調之旣出遠
來文人之相輕或指沙羨之仄岸或云臨嶂之烏林謂摘詞
之失据豈傾耳之知音抑有味乎寓言曷少念其感興茲企
黃岡縣志

卷之三

詩

十

懷於後代久抱歎夫斯情喜騷客以韻事兮掩霸業之雄能
恍遺風之未遠兮寧勝蹟之勿珍倘遜步於往哲兮必見唾
於山靈值姑洗之應律兮正勾芒之司辰看奇蹤之遶郭兮
盼麥穗之映津尙桂酒之堪謀兮便蘭棹以再尋攀滄水之
芳葢兮攜樊口之細鱗烹鳳樓之清泉兮按陸羽之茶經竊
以踵巴人之下里匪敢續坡仙之餘勅固已油油乎樂寥廓
之厚載嶂嶂乎沐浩蕩之深仁

問津書院賦

曹翰
尊江

繫問津之古院聳神明之故墟據翼軫之分野當楚蔡之通
衢後碧嶂以環抱前清溪以盤紆上倚觀川之危石下臨滌

筆之汚瀦魏書城其坐擁帶院落以相於鐘鼓揚靈於河曲
絃歌流韻於山隅因一日轍環之蹟作千秋考道之區粵自
有唐杜牧廟建文宣宋之孟珙廣舍山巔仁夫龍氏大啟講
筵逮有明之中葉迄萬厯之季年前有胡孫之創建繼有蕭
王之改遷去舊廟之湫隘卽新宮之安閒上奉聖像道貌岸
然左祀仲子沮溺右祀朱子儒先下及縉紳名宦有功斯土
者皆得從祀於其間爾其爲狀也峩峩業業煒煌煌樹中
天之華闕凌冠山之明堂方圓則法乎天地闔闢則象乎陰
陽旣星羅而碁布亦翼舒而箕張軼雲雨於天際迴虹蜺於
崇岡爛兮若朝暎之激景皎兮若明月之流光遠而望之如

黃岡縣志

卷之三

詩

十一

入丹青之室近而察之恍遊金碧之鄉其爲制也後爲寢殿
榜曰大成重榮複楹畫棟雕甍虹梁煜爚藻井玢璘金釘銜
璧玉瑱居楹飛欄翼以軒翥反宇轍以騫騰瓦獸躩踞於屋
脊金爵上棲於觚稜張網戶以朱綴絡綸連以青縈仰靈宮
之肅穆等仙禁之深沉殿外則重軒三階元墀卸砌蟠文螭
於雲坳繞蛟龍於丹陛銅池承霽以矗落露臺臨虛而峻嶸
鋪磴道以綺錯攢危檐而鱗次覽曲檻以廊迴覺神眩而目
昧中爲禮殿亦曰講堂建連屏之端正書聖經之琳琅皓壁
晴曜以月照丹桂欵絕而電光勒禁楩以踈密承陽馬以圓
方欒拱天矯以交結楫櫨角落以高驤鴻贖焜而燦閭極崇

隆而堂皇納雲霞於戶牖吞日星於軒窗羌左平而右城夾
馳道於中央厯九階以延佇指雙闕以翺翔啟南端之闕闕
顏書院以問津夾左右之兩掖傲玉振與金聲修闔扇之壯
麗釘浮漚之繽紛朱闕岩堯兮金鋪耀日彤扉鴉軋兮獸環
驚人厥有東廡堂曰問津耜耕齋曰潔粢奉牲綺疏露榻瑣
闔雲蒸望衡對宇遙連乎飽德之亭又有西廡祠則文公諸
儒館則齋宿藏書璇題月湛繡栊星鋪連窻複閣直接乎從
先之居由兩廡以各出夾中門而平分規隙地以立柵列畫
戟以爲門兩坊對峙雙柱高擎德配天地道冠古今面牆一
堵彩畫麒麟當櫺星而壁立視天子之外屏院後四壁宮牆

黃岡縣志

卷之三

詩

十二

縱橫儼衆星之拱極護賢關聖域以攸寧宮室旣飭禮器斯
彰開神厨而數典檢祭庫以搜藏尊則全乎犧象瓚則備乎
圭璋鼎則鼐鼐鉞鬲俎則椀斝棋房簋簋共登鉶競美豆籩
與爵勺交相篆刻兼饗餐雲雷之古雕鏤極夔龍龜雀之光
他若麾旛巾幘疊洗篚筐千態萬狀不可殫詳禮儀旣備樂
器孔昭考宮懸於殿陞察篋簾於堂均鐘則鏞鏞笙頌鼓則
楹足縣鼗磬則製泗濱之石笙則採曲沃之匏絲則瑤琴錦
瑟竹則龍笛鳳簫木則祝敔互用埴則雅頌均調推之籥簫
炳耀旌節飄搖靡不雲謁而波詭玉立而星標其釋奠則始
以如壯之上丁後以寤元之旣望延守令丞博以主祿將合

縉紳先達以爲顯相或執豆而承邊或省牲而莅鬯漆盛則
黍稷馨香牲牢則牛羊茁壯禮九拜以肅雝樂六奏以和暢
列佾舞於階東階西合聲歌於堂下堂上飲福則官師悉受
其鴻釐頒胙則闈庖咸蒙夫異貺夔章比闕里以差殊典禮
較辟靡而無讓其講學則始於元季盛於明中本郡之儒紳
畢集異方之師友來從軒蓋相望於道路臯比並列於儒宮
派姚江者以致良知爲主學甘泉者以體天理爲宗奪席而
戴憑倏至解頤而匡鼎初逢講道著河汾之盛談經追虎觀
之雄戶外之坐席常滿橋門之觀聽雍容爭紹程朱之脉遠
追鄒魯之風其會課或舉以二季或定以四時遐邇雲集生

徒影隨先之以制藝次之以賦詩排坐防濫監門絕私閭閻
秩秩濟濟祁祁紛嘈兮似春蠶之食葉奮勇兮如戰士之銜
枚競登壇而拔幟羣入海以探驪沿夜分而投卷逮試畢而
彙齊司會則矢公矢慎衡文亦無詐無欺多士遂登龍之願
眞才矜倚馬之奇葵邱復會於此日幾復再見於今茲至若
師傅端居生童住宿終日孜孜窮年碌碌冬釭燭兮筆花紅
春晝永兮窻草綠開絳帳以傳經下緇帷而課讀負笈皆英
俊之流鼓篋盡衣冠之族執經問義者借來緼瑟歌風者相
屬親弟子之芣苢飽先生之苜蓿覺師嚴而道尊可化民而
成俗是蓋以詩書爲堂奧以性命爲丕基以禮義爲門路以

道德爲藩籬南國圖書之府西陵禮樂之司絃誦之風流未
墜襄軒之日月於斯不獨嶽麓嵩陽不可及亦非鵝湖鹿洞
所能幾矣千里之楚疆曾經幾代問七百之書社今屬阿誰
曷若此問津片壤宮闕巍巍直與尼山洙泗相終始而無有
窮期

孔子山賦

曹翰

歷皇輿以周覽得聖蹟於邾城據離明之正位符艮止之休
聲氣磅礴而鬱積勢嶙峋以峭嶒襟江湖而帶倒舉控弦軼
而揖巴衡因至人之游歷肇錫予以嘉名遂使土壤被素王
之號而致山靈冒先聖之稱爰溯所自副嶽鍾祥胚胎濇霍

黃岡縣志

卷之三

詩

古

綿亘江黃擎天柱以脉落轟龜峯而首昂乍盤迴而過柏舉
旋蜿蜒而入寧鄉聳大崎之峻極帶接天之混茫龍岡西走
馬鞍南翔結五雲之華蓋作百城之保障延袤數十餘里巋
然屹立于茲方千態萬狀詭跡殊蹤凹者成窪凸者成峯嶺
騫騰而似鳳岡天矯以如龍映日之芙蓉隱隱撐天之紫蓋
重重擬齊雲兮縹緲侔偃月兮穹窿旣箕張而斗峻亦星拱
而雲從儼卦疇之羅列而太極之在中後倚回車之古埠前
俯問津之長河左挹顏港之雲樹右擁文崎之烟螺沖長沮
而寥廓阪桀溺以陂陀耜耕之田紛其繡錯進步之石鬱以
嗟峩上有講經之臺下有晒書之場繞以墨池之浩蕩觀以

硯石之光芒承以觀川之坐石翼以拱雉之山梁丹崖舒霞
碧嶂凝翠松檜參天藤蘿交翳春雨空濛秋陰迢遞烟雲變
幻於晨昏虹霓連蜷於晴霽谷暗而陰陽爲之晦冥林深而
日月爲之虧蔽天晴則魚躍鳶飛夜靜則猿啼鶴唳澗泉響
而魯壁之絲竹長聆颺籟馳而泗水之絃歌未替東迤平麓
則疑於夔相之圃西憑小市則似乎五父之衢講院巍峩兮
闕里烟墩高敞兮舞雩青蓮峙尼山之五老黃林蔚緇帷之
一區緬杏壇其未遠比孔里以何殊命杖履以徐步入烟巒
之崔嵬度懸磴兮玲瓏指迷津兮迤漚歎人事之代謝幸山
川之未改憶車聲兮如聞尋轍迹兮宛在知鳳德之未衰信
黃岡縣志

卷之三

詩

五

麟蹤之可待而斯人吾與之懷永綿邈於千載

辭

宋

黃泥坂辭

蘇軾

出臨臯而東驚兮並萊祠而北轉走雪堂之坡陁兮歷黃泥
之長坂大江洶以左繚兮渺雲濤之舒卷草木層累而右附
兮蔚柯邱之葱蒨余旦往而夕還兮步徙倚而盤桓雖信美
不可居兮苟娛余於一盼余幼好此奇服兮襲前人之詭幻
老更變而自晒兮悟驚俗之來患釋寶璐而被繒絮兮雜市
人而無辨路悠悠其莫往來兮守一席而窮年時游步而遠

覽兮路窮盡而旋反朝嬉黃泥之白雲兮暮宿雪堂之青煙
喜息鳥之莫余驚兮幸樵蘇之我媪初被酒以行歌兮忽放
杖而醉偃草爲茵而塊爲枕兮穆草堂之清讌紛墜露之溼
衣兮升素月之團團感父老之呼覺兮恐牛羊之予踐於是
蹶然而起起而歌曰月明兮星稀迎余往兮餞余歸歲既晏
兮草木腓歸來歸來兮黃泥不可以久嬉子瞻嘗自書詞後云余在黃州大醉
中作此詞小兒輩藏去藁醒後不復見也前夜與黃魯直張
文潛晁無咎夜坐三客翻倒几案搜索篋筒偶得之字半不
可讀以意尋究乃得其全文潛喜甚手錄一本遺余持元本
去明日得王晉卿書云吾日久購子書不厭近又以三緘博
兩紙子有近書當稍以遺我毋多費我絹
也乃用澄心堂紙李承曼墨書此遺之

元

黃岡縣志

卷之三

詩

十六

龍邱引擬楚龍邱子作

吳萊

春花兮亂開秋葉兮滿階時不再來兮我憂用老獨行懷思
兮我歸無所鳥則有翼兮魚則有鬣潛霍有岳兮江漢斯陂
徘徊不進兮尻彼路歧僕夫告病兮饑馬齧其我夢之歸兮
吾鄉我里門闕依稀兮墟墓則邇魂神恹怳兮一夕九徙父
母何在兮敢及妻子天陰歲莫兮北風之寒曰我無衣兮坐
不能飧我拊我膺兮摧我肺肝閔天嗟嗟兮喟其增歎

明

黃州謁蘇文忠祠

廖道南

歲闕逢兮涖灘澶吾道兮江干遵黃墟兮浩淼艤鳧舟兮盤

桓趨靈祠兮擊鼓薦葢藻兮焚蘭悲伊人兮不作志坎壈兮
多艱抗危言兮逢紛履險機兮罹讒屈鳳鳥兮鷦鷯詆麒麟
兮羆豸擯瑇琪兮瓦礫踐芝英兮草菅據蒺藜兮因石將孰
往兮奚安嘯赤嶼兮摘藻弄浦月兮潺湲駕一葦兮凌濤俯
江閣兮觀瀾審予來兮歲暮木葉下兮驚湍仰遺容兮若在
鬱懣恨兮空山

寄贈萬退修

胡承諾

有美一人兮樂隱居十有七載兮碧溪之隅閉戶兮奚爲啟
南窗兮著書訂韶華兮方盛怪壯志兮未摠欲寄言兮王孫
冀招來兮我須時不可兮坐失曷青紫兮往紆羌告我以不
暇兮又申之以異趨山四更兮吐月水三篙兮落渠緯寒蕭
兮障蟹漫春塘兮生魚辟野鹿兮巖屋放白鷗兮江湖林續
紛兮獨往市囂塵兮亟逋書波瀾兮不起矯六翩兮誰笈人
之相知兮貴相知心聽君之言兮益縱君之所如

詩

五言古

南朝宋

王撫軍庾西陽集別

沈約宋書曰王宏監豫州之西陽
新蔡諸軍事撫軍將軍江州刺史

庾登之爲西陽太守入爲太子庶子集序曰謝
還豫章太守庾被徵還都王送至湓口南樓作

謝瞻

祇召旋北京守官反南服方舟析舊知對筵曠明牧舉觴矜
飲餞指途念出宿來晨無定端別晷有成速頽陽照通津夕
陰曖平陸榜人理行艫輪軒命歸僕分手東城闐發櫂西江
澳離會雖相親逝川豈往復誰謂情可書盡言非尺牘
梁

赴荊州泊三江口

元帝

步江望行旅金鉦閒綵旂水際含天色虹光入浪浮柳條恒
掃岸花氣盡薰舟叢林多故社單戍有危樓疊鼓隨朱鷺長
簫應紫騮蓮舟夾鶴筆畫舸覆緹油榜歌殊未息於茲泛安
流

黃岡縣志

卷之三

詩

十八

登琴臺

簡文帝

蕪階踐昔逕復想鳴琴遊音容萬卷罷高名千載留弱枝生
古樹舊石抗新流由來遞相嘆逝川終不收

宋

月波樓

有序

王禹偁元之

月波之名不知得於誰氏圖綴故老皆無聞焉因作古詩
一章凡六百八十字陷於樓壁庶使茲樓之名得與詩俱
不泯也

郡城無大小雉堞皆有樓其間有名者不過十數州吹簫事
遼迴仙迹難尋求庾公在九江締構何風流謝守鑿宣城疊

嶂名有由東陽做八詠吾聞沈隱侯白雪梁鄧申調高誰和
酬黃鶴倚鄂渚仙去事悠悠贊皇謫滌上作賦懷嵩邱樓居
出俗態澤國多勝遊好景不遇人安得名存留齊安吉郡廢
移此清江頭築城隨山勢屈曲伏環周茲樓最軒豁曠望西
北陬武昌地如掌天末入雙眸平遠無林木一望同離婁山
形如八字會合勢相勾東晉方士戴洋言武昌有山無林山
形如八字勢不及九故孫權以黃武
元年都武昌
八年遷建業三國事既遠六朝名亦休近從唐末來爭奪互
仇讐斯樓備矢石此地控咽喉終朝望烽燧連歲事戈矛可
憐好詩景牢落無人收皇家統萬國遠邇盡懷柔三聖四十
年蕩蕩文德修淮甸爲內地黃岡爲上游儒服假郡印踐更

黃岡縣志

卷之三

詩

十九

若公郵况多辨職吏誰肯恣吟謳伊余何爲者竊慕騷人儔
兩朝掌文翰十年侍冕旒去歲出西掖謫居抱窮愁日日江
樓上風物得冥搜何人名月波此義頗爲優西南新桂魄初
上懸玉鉤晚瀨清且淺漂蕩影洄浮三五金波滿夜光如暗
投驪龍弄領珠晃朗照汀洲澹臺披寶劍碎壁斬長虬冰輪
曉入地推下赤金毬闌干四五星斜漢印清秋誰家上元燈
而盛剗馥蘼此景吟不出謾使聲呦呦千里畫圖濶四時詩
興幽野花媚宮纈芳草鋪碧綢火雲照沙浦暴雨傾瓦溝白
亂蘆花散紅殷藜穗稠簷冰垂若練雪片大於鷗江薩燿漠
漠官柳雨颼颼舟子斜盪槳牧童倒騎牛水獺有時戲江豚

頗能泗山鳥奏竽籟落霞展衾綉魚網雪離離酒旗風颼颼
放懷雖自適詩物奈相尤右顧徐邈洞精靈如在不左瞰伍
員廟荒隙令人羞樓中何所有官醞湛蚍蜉棋枰留客坐琴
調待僧抽橘苞鄰藥鼎墨筆問茶甌平生性幽獨寂寞誰獻
酬官常已三黜懷抱罹百憂凭欄憶王粲望闕同子牟自甘
成潦倒無復事聲猷身世喻泡幻衣冠如贅瘤放意無何鄉
誰分親與仇寓形朝籍中毀譽任啁啾君恩無路報民瘼無
術瘳惟慙戀祿俸未去耕田疇題詩郡樓上含毫思義猷功
名非范蠡何必泛扁舟

涵輝樓

韓琦稚圭

黃岡縣志

卷之三

詩

二十

臨江三四樓次第歷城首山光徧軒楹波影撼窻牖予兄天
聖中向攝齊安守兄才無不宜吏治孰可偶公庭常寂然所
樂在文酒

安國寺浴堂

蘇軾

老來百事懶身垢猶念浴衰髮不到耳尙煩月一沐山城足
薪炭烟霧濛湯谷塵垢能幾何滌然脫羈梏披衣坐小閣散
髮臨修竹心因萬緣空身安一床足豈惟忘淨穢兼以謝榮
辱默歸無多談此理觀要熟

定惠院願師爲余竹下開嘯軒

蘇軾

啼鳩催天明噎噎相詆譏暗蛩泣夜永唧唧自相弔飲風蟬

至潔長吟不改調食土蚓無腸亦自終
夕叫鳶貪聲最鄙鷓
喜意可料皆緣不平鳴慟哭等嬉笑
阮生已疎狂孫子亦未
妙道人開此軒清坐默自照衝風振河海不能號無竅累盡
吾何言風來竹自嘯

遷居臨臯亭

蘇軾

我生天地間一蟻寄大磨區區欲右行不救風輪左誰云走
仁義未免遲寒餓劍米有危炊鍼鹽無隱坐豈無佳山水借
眼風雨過歸田不待老勇決凡幾箇幸茲廢棄餘疲馬解鞍
馱全家占江驛絕境天爲破饑貧相乘除未見可弔賀澹然
無憂樂苦語不成些

黃岡縣志

卷之三

詩

三

東坡八首

有序

蘇軾

予至黃二年日以困匱故人馬正卿哀予乏食爲於郡中
請故營地數十畝使得躬耕其中地旣久荒爲茨棘瓦礫
之場而歲又大旱墾闢之勞筋力殆盡釋耒而歎乃作是
詩自愍其勤庶幾來歲之人以忘其勞焉

廢壘無人顧頽然滿蓬蒿誰能損筋力歲晚不償勞獨有孤
旅人天窮無所逃端來拾瓦礫歲旱土不膏崎嶇草棘中欲
刮一寸毛喟然釋耒歎我廩何時高

荒田雖浪莽高卑各有適下涇種秔稌東園蒔棗栗江南有
蜀土桑果已許乞好竹不難栽便恐鞞橫逸仍須卜佳處規

以安我室家童燒枯草走報暗井出一飽未敢期瓢飲已可必

自昔有微泉來從遠嶺背穿城過聚落流惡壯蓬艾去為柯氏陂十畝魚鰕會歲旱泉亦竭枯萍粘破塊昨夜南山雲雨

到一犁外泣然尋故瀆知我理荒蒼泥芹有宿根一寸嗟獨

在雪芽何時動春鳩行可膾蜀人貴芹芽膾雜鳩肉作之

種稻清明前樂事我能數毛空暗春澤鉞水好聞語蜀人以細雨為

雨毛稻初生時農夫相語稻鉞水矣分秧及初夏漸喜風葉舉月明看露上一

一珠垂縷秋來霜穗重顛倒相撐柱但聞畦隴間蚱蜢如風

雨蜀中稻熟時蚱蜢羣飛田間如水蝗狀而不害稻新春便入甌玉粒照筐筥我人

黃岡縣志 卷之三

食官倉紅腐等泥土行當知此味口腹已可許

良農惜地力幸此十年荒桑柘未及成一麥庶可望投種未

逾月覆塊已蒼蒼農夫告我言勿使苗葉昌君欲富餅餌要

須縱牛羊再拜謝苦言得飽不敢忘

種棗期可剝種松期可斲事在十年外吾計亦已愨十年何

足道千載如風電舊聞李衡奴此策疑可學我有同舍郎官

居在瀟岳李公遺也遺我三寸柑照座光卓犖百栽儻可致當及

春冰渥想見竹籬間青黃垂屋角

潘子久不調沽酒江南村郭生本將種賣藥市西垣古生亦

好事恐是押衙孫家有十畝竹無時容叩門我窮舊交絕三

詩

子獨見存從我於東坡勞餉同一飡可憐杜拾遺事與朱阮
論吾師卜子夏四海皆弟昆

馬生本窮士從我二十年日夜望我貴求分買山錢我今反
累生借耕輟茲田刮毛龜背上何時得成瓊可憐馬生癡至
今誇我賢眾笑終不悔施一嘗獲千

大寒步至東坡贈巢三

蘇軾

春雨如暗塵春風吹倒人東坡數間屋巢子與誰鄰空牀斂
敗絮破竈鬱生薪相對不言寒哀哉知我貧我有一瓢酒獨
飲良不仁未能頹我頰聊復濡子唇故人千鍾祿馭吏醉吐
茵那知我與子坐作寒螿聲努力莫怨天我爾皆天民行看

黃岡縣志 卷之三

詩

三

花柳動共亭無邊春

浚井

即東坡暗井也

蘇軾

古井沒荒萊不食誰爲慟鑿鑿下兩繩蛙蚓飛百尺腥風散
泥滓空響聞點滴上除青青芹下洗鑿鑿石沾濡愧童僕盃
酒暖寒栗白水漸漚渟青天落寒碧云何失蒼穢庶事來新
潔井在有無中無來亦無失

日日出東門

東坡圖云東門近東城之門也
在乾明寺前五十步今無矣

蘇軾

日日出東門步尋東城遊城門拖關卒笑我此何求我亦無
所求駕言寫我憂意適忽忘反路窮乃歸休懸知百歲後父

老說故侯古來賢達人此路誰不由百年寓華屋千載歸山
邱何事羊公子不肯過西州

元修菜 有序

蘇軾

菜之美者有吾鄉之菜故人巢元修嗜之予亦嗜之元修
云使孔北海見當復云吾家菜耶因謂之元修菜余去鄉
十有五年思而不可得元修適自蜀來見余於黃乃作是
詩使歸致其子而種之東坡之下云

彼美君家菜鋪田綠茸茸豆莢圓且小槐芽細而豐種之秋
雨餘擢秀繁霜中欲花而未萼一一如青蟲是時青裙女採
撚何匆匆蒸之復湘之香色蔚其饒點酒下鹽豉縷橙芼薑

黃岡縣志

卷之三

詩

三

葱那知雞與豚但恐放箸空春盡苗葉老耕翻煙雨叢澗墮
甘澤化暖作青泥融始終不我負力與糞壤同我老忘家舍
楚音變兒童此物獨嫵媚終年繫予胸君歸致其子囊盛勿
函封張騫移首藉適用如葵菘馬援載薏苡羅生等蒿蓬懸
之東坡下培鹵化干鍾長使齊安人指此說兩翁

問大冶長老乞桃花茶栽東坡

蘇軾

周詩記苦茶茗飲出近世初緣厭梁肉假此雪昏滯嗟我五
畝園桑麥苦蒙翳不令寸地閒更乞茶子莖饑寒未知免已
作大飽計庶將通有無農末不相戾春來凍地裂紫筍森已
銳牛羊煩訶叱筐筥未敢晚江南老道人齒髮日夜逝他年

雪堂品尙記桃花裔

曉至巴河口迎子由

蘇軾

去年御史府舉動觸四壁幽幽百尺井仰天無一席隔牆聞
歌呼自恨計之失留詩不忍寫苦淚漬紙筆餘生復何幸樂
事有今日江流鏡面淨烟雨輕幕幕孤舟如鳧鷖點破千頃
碧聞君在磁湖欲見隔咫尺朝來好風色旗尾西北擲行當
中流見笑眼清光溢此邦疑可老修竹帶泉石欲買柯氏林
茲謀待君必

杭州故人信至齊安

蘇軾

昨夜風月清夢到西湖上朝來聞好語叩戶得吳餉輕圓白

黃岡縣志

卷之三

詩

三五

曬荔脆醃紅螺醬更將西菴茶勸我洗江瘴故人情義重說
我必西向一年兩僕夫千里問無恙相期結書社故人相約

夫一歲

未怕供詩帳

僕頃以詩得罪有旨移杭取境內所留詩杭州供數百首謂之詩帳

還將

夢魂去一夜到江漲

江漲杭州橋名

陳季常見過二首

蘇軾

仕宦常畏人退居還喜客君來輒館我未覺雞黍窄東坡有
奇事已種十畝麥但得君眼青不辭奴飯白

送君四十里只使一帆風江邊千樹柳落我酒杯中此行非
遠別此樂故無窮但願長如此來往一注同

寒食雨

蘇軾

自我來黃州已過三寒食年年欲惜春春去不容惜今年又
苦雨兩月秋蕭瑟臥聞海棠花泥汙臙脂雪暗中偷負去半
夜真有力何殊病少年病起頭已白

戲作種松

蘇軾

我昔少年日種松滿東岡初移一寸根瑣細如插秧二年黃
茅下一一攢麥芒三年出蓬艾滿山散牛羊不見十餘年想
作龍蛇長夜風波浪碎朝露珠璣香我欲食其膏已伐百本
桑人事多乖迂神藥意渺茫塌來齊安野夾路鬚髯蒼會開
龜蛇窟不惜斤斧創縱未得茯苓且當拾流觴盞盞百出入
皎然散飛霜槁死三彭仇澡換五穀腸青骨凝綠髓丹田發

黃岡縣志

卷之三

詩

三

幽光白髮何足道要使雙瞳方却後五百年騎鶴還故鄉

題王黃州墨蹟後

黃庭堅 魯直

掘地與斷木智不如機舂聖人懷餘巧故爲萬物宗世有斲
泥手或不待郢工往時王黃州謀國極匪躬朝聞不及夕百
士避其鋒九鼎安磐石一身轉孤蓬浮雲當日月白髮照秋
空諸君發蒙耳汲直與臣同

寄陳季常

秦觀 少游

一鉤五十牒始具任公釣揭竿趣灌瀆與爾不同調先生本
西蜀俠氣見英妙哀憐世間兒細黠似黃鶴侍童雙擢玉鬢
髮光可照駿馬錦障泥相隨窮海嶠平生攜手好十七登廊

廟小生相吏耶徒枉尺書召暮年更折節學佛得心要鬻馬
放阿樊幅巾對沈燎泠泠屋外泉兀兀原頭燒欲知山中樂
萬古同一笑

別黃州

張耒 文潛

扁舟發孤城揮手謝送者山回地勢卷天豁江面鴻中流望
赤壁石脚插水下昏昏煙霧嶺歷歷漁樵舍居此實三載鄰
里通借假別之豈無情老淚爲一洒篙工起鳴鼓輕櫓健於
馬聊爲過江宿寂寂樊山夜

王立之大裘軒

謝逸 無逸

小人拙生事三冬臥無帳忍寒東窗底坐待朝曦上徐徐晨

黃岡縣志

卷之三

詩

三十七

光熙稍稍血氣暢薰然四體和恍若醉春釀此法秘勿傳不
易重裊養君胡得此法開軒亦東向蘇公名大裘意豈在萬
丈但觀名軒心人人如挾纊

燈下讀書

陸游 務觀

少年喜書策白首意未足幽窗燈一點樂處超五欲而况黃
州路小雨漁村宿蕭蕭兼葭聲爲我洗暑毒琅然誦經史少
倦兒爲續何必效萊公長夜醉畫燭

泊三江口

陸游

遲明離武昌薄暮次黃岡勿言觸熱行一雨三日涼北窗菽
蕭蕭南窗江茫茫元雲一池墨碧綫半篆香尙無車馬塵况

復爭奪場徐行勿挂帆此樂殊未央

月下步至臨臯亭

陸游

芒屨踏松陰迨此船未發清遊豈無伴三友風露月山川
盤紆鷗鷺浩滅沒當年老先生想像散醉髮浮生等昨夢
已埋玉骨吾儕幸彊健何事拘簪笏

發黃州泊巴河遊馬祈寺

陸游

南望武昌山北望齊安城楚江萬頃緣著我畫舫橫雲岫不
須挂鼉鼓不須鳴淡然隱曲几山水相逢迎疎雨漏薄日非
陰亦非晴晚泊巴河市小陌聞展聲紫髯刑馬地一怒江漢
清中原今何如感我白髮生

黃岡縣志

卷之三

詩

三八

明

黃州演武廳晏集贈石帥

王廷相 子衡

屏氛出江郊選幽憩武館秋容已淡沱雲物亦回緬江山佳
入牖聊爾憑一覽道悟見乃起志恆與不淺招邀子所敦襟
期我當歛雖值旅務迫不廢賓筵展會屢詎流連談劇非縱
誕窈窕漢上曲清切江南管投壺按魯鼓揮琴述中散居易
命可俟撫化慮始遣江崩赤壁磯岸折黃泥坂蘇公豪遊跡
咫尺竟莫辨賞心卽命觴庶達養生纂

舟及團風以事復回黃州

王廷相

遄發齊安城野憩團風坂簡書申巽命造次促權返中夜凌

迴江侵晨見南嶽推蓬納升旭覽勝紛可辨崑桂霞影蕩江
離露珠泣時物豈不麗滯旅興莫展鹿門逐耕稼太史樂遊
衍高賢雖自許干祿竟澠忽重來日云積歸計路應緬長嘯
行曠達偃臥戒憤懣勞謙業以廣止坎道乃善楚氛與日搆
持此庶可遣

遊定惠院

王廷相

萋萋芳蕪郭杳杳青蓮宮隔陴睇瑤林亭午聞霜鐘雲霞紛
綺麗木石遞玲瓏羈心愜蒼郊苦旅攄幽悰旣登雲中閣復
眺江上峯水沿狎鷗鳥洲擘斂芙蓉已協隱淪趣堪擬蓬壺
逢惜非虎溪遊一笑證遠公濁世豈不厭妙適要可通妻孥

黃岡縣志

卷之三

詩

二十九

歸性真宰丞亮天工義旨顧靡偕慨息方彌重獨有滅心垢
可與淨者同

赤壁亭晏謝蔣子胡子

王廷相

適志在林邱所嗟嬰宦籍雖偶登嶽謠終爾煙霞隔即來有
所期蘭尊荷時哲虛館俯江郊况覽豪賢跡鳴雷輕隔浦涼
風近將夕遊禽屬啁啾落木方撼撼瑤草未堪贈佳人徒良
覲遠心入洞庭曠覽狹夢澤事往情彌牽年衰感易迫已悲
王子車終返原生宅賞心非外慕懷賢亦屢積且逐俄頃懽
爲君謝行役

乞罷南歸過黃岡次舊游韻四章

林大輅

雙眸紫氣橫西郊寒飈廣伊懷西方人眷茲滄洲賞景曠融
道情豈牽簪纓想仰高盼山椒東流大江朗渚鳴羣鷗飛煙
舒獨鶴上喟予謝浮榮敢言愜疎放荒荒古木疎綿綿元雲
長虛無只蓬瀛長公得真象從之不可追試招漁人榜

投簪協遐思驅車游黃岡黃岡非我游所思赤壁長煙光連
江滸石徑明宵霜林聲聞歌管筠影橫瓊觴策策羣飛鴉日
暮鳴徜徉雲中鴈相呼萬里獨南翔斗酒呼歲華况乃滄海
浪回首思佳人仙蹤今微茫問之元鶴夢何如炊黃梁

杲日照北林丹崖俯幽壑澄流碧於藍微風吹雲漠遠渚旣
縈紆層峯亦連絡樵路莽荆榛村樹棲烏雀緬彼達士懷形

黃岡縣志

卷之三

詩

三

骸非有託撫化薄浮名招搖千古樂我今已明農重游宛如
昨神曠物徒縈歲寒江猶廓縱談天壤間豈復知龍蠖巾舄
偕樵漁聊謝世人度

昔者蘇長公淹留黃泥坂羈旅本無營簞瓢同歲晚武昌魚
雖薄猶勝惠州飯赤壁對暮齡扁舟亦繼繼才高愛者稀瓠
落還混沌兩賦達元門萬事期寒暖二客者誰何時亦樂嘉
遯張翰煙雲姿陳琳天趣遠方舟夾雙流淡日輝霜臆往事
眷深衷茲游亦嫵婉北風吹歸興麥斜林臥穩豈無他人懷
江湖終偃蹇

赤壁泛舟

許宗魯伯誠

輟翰去幽館揚舫泝河淵澄瀾鏡羽蓋倒影浮賓筵前曉霞
壁麗側泛雲島妍窓飈扇微縹織魄流通川岸姿媚嘉月水
容漾遙天雜卉芬紫岫鮮葩耀碧泉躍鱗擲素波慧羽矜繁
絃嘉朋艷簪盍時景臻華年淑氣怡賞情和春薄沖元擷芳
縱泮渙命酒恣留連俯仰攬故蹟悵望懷昔賢雅抱良不窮
既醉陳茲篇

擬矯志篇

王廷陳 雜欵

蛟龍雖困不資凡魚鸞鷲雖孤不配鶩雛雖有香草當戶必
除雖有仁人在敵必誅狐白雖美炎暑必置舟車之用易地
則棄蕙蘭不采無異蓬蒿干將不試世比鉛刀以驥捕鼠曾
不如狸餓夫獲璧不如得糜郭生純臣曾連高士彼乃登臺
此則蹈海寧直見伐無爲曲全寧渴而死不飲盜泉

壯士篇

王廷陳

少年學劍術英風聞九州慷慨出門去辭家將遠遊遠遊欲
何之炎荒爲我伏昨聞遣飛將召募何時休國威有不揚無
乃壯士羞奮矛如迅湍拔距踰亭樓猛氣伏羆虎勝躍捷獮
猴置身百戰場妻子不顧留性命良足憐聊以紆主憂揮戈
盪蠻煙飲馬江漢流餘勇萬人賈雄傑無匹儔功成獻大庭
賜爵位通侯

眺江閣述感

王廷陳

偶遣邱中步來眺江上閣樹裏呂王城草邊邾子郭遺宮隱
莫尋往牒恍難託春深苦竹滋秋高白鳥落故堞啼早鴉野
田噪暮雀頗爲樵牧資焉免狐鼠虐雍門哀有餘九原何可
作

園亭言懷

王廷陳

駿死骨誰市象焚齒自累棄置悲團扇齟齬嘆方枘恥隨荆
橘化樂與魏瓠棄素無金張援焉取邱園賁農圃衍世業桑
麻綜歲計實飽三士桃芳引八公桂春原露未晞秋臯霜已
被偶絲物態感遂與神理契居度無能淹金石亦善做願言
齊得喪庶以紓勞瘁

黃岡縣志

卷之三

詩

三十二

赤壁圖

楊

慎

十四
歲作

曹瞞下江陵江陵正危劇周郎美少年氣吞江漢窄水戰得
上流火攻非下策臥龍東畧雄烏鵲南飛迫妖氛掩黃星倒
戈回紫陌鼎足已成形鬼蜮俄褫魄王業聊偏安蜀圖何赫
奕懷哉玉堂仙逝矣黃州客文光貫斗牛天遊忘遷謫名姓
識兒童畫圖粲金碧赤壁幾千秋山青江月白

留雲洞

陳宗虞

古洞解留雲不解留車馬笑此行路心又逐山亭下拂衣向
前楹元雲夜堪把蒼狗與白衣出岫何爲者爲霖在九垓從
龍亦瀟灑

登陽邏驛樓

郭鳳儀 桐岡

雄邛枕巨津櫺軒瞰木杪弭棹亦何營攀梯肆周眺長江浩
無極連山青未了但覺去帆遲莫辨歸舟小參差遠樹迷
亂輕鷗矯入夏暑雨盈是日炎蒸少吏道常局迫人事多
擾逸興寄嵩麓滯跡猶江表愧無排虛翮臨風羨高鳥

遊赤壁

何遷

初冬歷陽坂浮景被繁林良辰愜元矚靈境宛招尋連巖
既窈窕累樹亦蕭森乘屨登瀛間虛無溢冲襟緬想秋夜
遊川原幽且深孤清詎同懷翹跡乃在今因之發靜嘯
激楚有餘音飛仙渺難求撫化異浮沉何如盡超忽聊得
山水心

黃岡縣志

卷之三

詩

三三

鄒彥吉使君招飲赤壁

吳國倫 明卿

使君展高晏飛蓋臨江圻陟彼千仞石樓觀何崔巍下有蛟
龍窟洪濤震漁磯古人一遺跡我來寧有期中庭見樊口蒲
樹相因依舊游日以新新知良不疑密坐恣歡酬情言旨如
飴君但發高唱勿謂知音稀

王稚欽吉士

八子詩之一

吳國倫

維楚故有才誰為稚欽偶早歲發天秀匠心應其手高視千
載前左馬相先後寧操湘女瑟恥擊秦人缶調世如弄丸罵
坐非使酒敖然詠新篇豈復聞師友遂為禮法攻一官棄如
垢傷彼荆山璞終焉不見剖

鄒彥吉使君招飲赤壁

方尚贊

高臺俯郡郭飛磴連崇岡古人跡未朽今復登斯堂南臨樊
山樹西望漢水陽使君政多暇攜客聊相羊薰風蕩遲景黃
鳥鳴且翔綺饌簇江鱗玉醴澄羽觴彬彬軒冕士燦燦翰墨
場縫掖亦何貴賓席承芬芳登高歡有作為樂戒無荒豈如
晉山簡酪酌習池傍

和吳明卿方仲美赤壁讌集

鄒迪光 彥吉

畢景百尺崖仰眺千仞臺漢水泝洄薄樊山葱蒨開檣帆逗
浦樹愴恍失去來鶴煙信容與簫聲亦悠哉陽鳥逝夕波蟾
影印石苔有酒須自醉為樂不用猜醜顏微令德雅藻屬上

黃岡縣志

卷之三十

詩

三首

才山水有深聽寧為知音哀

雪堂詠懷二首

鄒迪光

夙抱理人術亦懷憂民心如何事纏牽託志翰墨林薄雲逗
疏館當軒列遙岑喜絕人吏跡兼乏鳥雀音對此坐偃仰南
薰盪衣襟鳴琴不下堂古人予所欽

魯連非吾尚子牟非吾師出處道自合囂寂理亦齊曰余剖
符竹竭來湘之湄披牘掇朝雲露冕奉春籬魏闕信傲屣齊
組豈土埃所以磬折間吏隱常在斯曾似蒙莊子昔者歎為
犧

赤壁感懷

易傲之

曹氏握漢綱已得天下半奉詞下江東投鞭流可斷日行三百里水軍八十萬幕下客繽紛人人出長算猛虎恣咆哮黎盡塗炭當其橫槊時無枝思已亂周郎方弱齡豫州正奔竄起將白羽揮覆若春冰泮老死不敢東竟就分香願雞肋始借劉鼎足猶存漢知非豚犬兒久識英雄冠故壘惟白雲孤城空赭岸伎倆終何爲悲哉供一粲三復飯牛歌長夜何時旦

崑山馬工部席中有古詩見貽賦答

陶允宜

會稽佳山水行吟足朝夕驅車一以遠投鞭每不憚俟罪刺黃州賞心在赤壁爲呼府中僚出訪江頭石矯有壁立姿而

黃岡縣志

卷之三

詩

三五

無斧痕劈寧向濁流邊獨作丹砂色人言三國時帝遣兩雄敵南軍勢不競東風借其力炎皇御燭龍雷車駐霹靂漫空朱鳥翔夾岸火雲赫大江蒸水氣洪爐煉金液樓船盡煨燼壁石皆燔炙譬彼昆岡焚詎免池魚厄素質獨不灰亮節久彌赤或者百萬兵乃其膏血激烏林夜渺渺雀臺春脈脈念此蘄黃間留彼英雄迹客稱工部郎胸掛堪輿籍爲道赤壁磯乃在嘉魚北寒灣軒冕稀古蹟風濤蝕前賦或誣夸二客空評隲我愛山水趣但遣才情癖束手受拘攣搖唇費彈射四海幾軒臺九州多禹蹟異人偶邂逅往牒爭組織爲謝祝融君巧奪老瞞魄總是一江連初非兩地隔楚王失其弓亦

復楚人得好將壘塊澆剖破藩籬塞蘇公自仙才陶子今同
請片語誠可投千秋足相識賓主旣笑喧歌人亦填溢戎旌
勳鞞鮮宮樣胭脂飾茜燭媚珊瑚香醪浮琥珀天際絳霞飛
臺前紅雨積組宇映葳蕤陀顏並愉適起立石壇高下望江
流窄冠蓋各東西江山又今昔

赤壁陪胡茂承宴賦

王同軌

壁壘血未乾霸氣中原散蘇公夫何爲復此弄文翰俱爲地
借名俯壁開樓觀上欲礙飛雲下踞江之半回思故聲華何
異暮與旦蘇公昔已悲翻爲後人歎我生室其旁君來自天
畔踏蘚秋尊攜木葉紛已亂痴絕君不無一笑冠纓斷高窺
黃岡縣志

卷之三

詩

三六

鶴鶴巢險坐鼉鼉岸題詩擊鉢成字字珠光爛尊罍歡處饒
年華暗中換却恐留徽音千秋益悲惋三益古所稱兩情殊
泮渙江上山聯翩從君徧探玩

過孔子問津處

茅瑞徵

驅車循四履晴巒來遠曙一水不容刀征人戒勿遽褰裳往
從之下流苦沮洳試扣此何爲云是問津處在昔鳳戢羽深
心嚮誰語屏營歧路側所遇溺與沮避世不避人相對一何
倨千載憑遺跡山川應可據我來出其傍茲行豈游豫六翮
阻高飛九折空叱馭雖馳雲外想已作粘泥絮仰止步荒祠
低回不能去

咏暑中雙柏

茅瑞徵

庭前有奇樹矯矯參天直古幹當勁風豐枝蔚其實閱世百年來朝華經幾草獨此雙珍木秀挺兩稱特豈必同衆芳所貴不朽德長夏落層陰赤日爲西匿高杪激清音遺芳故盈側雖無媚俗姿而有凌雲色吾拙久已微偕爾宛相識遠植在及時令名永不忒

春日赤壁晚眺效謝康樂體二首

呂元音 節之

步出城西隅翛然靈界敞輕陰澹夕暉涼風正飄蕩雨初綠野秀臺高白雲朗疊雉刺中流千颿落滂泱林煙曳翠綃湖霞披絳幌旣懽僻野性復挾滄洲賞振衣登前岡徘徊命吾黃岡縣志 卷之三 詩 三

倚層樓一嘯衆山響

纖月掛東林羲和節西弭遊目意未足緩步信所履逕轉石磴圻溪漲漁梁毀翠荇出水鮮朱櫻然林紫涓涓芳露潤淡淡行雲止野照光空明泉溜響清泚伊余邱壑姿眷茲景物美登眺豁幽襟俛仰忘悲喜凭高身以軒臨流耳堪洗泠泠御遠風悠悠得真理塵世事俱非獨此逍遙是預愁還城市車馬紛如駛

臥病懷同好諸子

劉養微 康谷

辭翰難割嗜好所鍾聊擬選體數章自娛寄當神選

何葦長

周道有崩頽塵軫恣騰鶩鏤金理旣訛輟響念彌固伊余秉拙訥投足怯窘步譽尤非考祥雕飾慮違故猥以孤睽姿親蒙三益顛傾蓋樊山賞駢筵赤壁晤叙離仍萬端協懽匪一趣已慙德鄰比復慚文會與蘭苕沐芬芳琬琰霑溫裕洵美平生遊胡寧離合遽解纜乖雲雨臥疴變朱素余淹桑梓墟子滯淮淝路箕風振曠野涼月麗高樹翩翩南雁翔悄悄西舟派引領限河梁躑躅不得渡

何緘仲

劉養微

臥疴甚懽趣感舊殷遙思豈伊讐歲月延促無前期微躬慙

黃岡縣志

卷之二十

詩

三

淵冰寤歎恒在茲美人敦懿義夙昔夢音徽音徽日夜隔心賞何由追緬懷投情悵探道觀元微遵塗宏正軌忸顏隆萬規荆璞不隻剖宋石必雙揮山川邈離異形影久參差昔別青陽徂今留白露滋涼颺盪清襟朗月耀光儀興玩瑤華音想像瓊樹枝投桃理空切盍簪願亦違占爻媿漸磐詠什慙緇衣久要崇篤固達權貴推移

秋日赤壁晚眺

陶國楨

落日散餘暉晴川斷煙爽丹楓映赭岸厯厯衆山朗征帆渺天末迴波激清響長鱗躍湍渚修羽翔深莽牧笛楊柳陰漁曲滄浪上極目萬里秋乘風起遐想浩歌振杯颺松檜亦偃

仰瞻茲夕霽澄殊愜泉壑賞飛霞幕層阿高懷將安做

聞易曦侯罵賊死

吳應箕 次尾

憶昔泊荻港適有黃州船心擬此船中曦侯或在焉曦侯亦
指予問名良復然夜半猶沽酒高談驚客眠秦淮一月聚古
今皆窮穿是時射策者四方多名賢時時來覘我相見出奇
篇曦侯對我嘆就流物理然慎子震驚意一善俾終全每感
良友規誦之中心鐫自君別我去濶晤已三年慇懃憑尺素
綿邈借山川豈知君死賊遠有義聲傳君無一命寄君無百
城專矻矻窮歲月閉廬絕市廛著書已滿屋次第國門懸奄
忽遭焚掠貫繫索金錢謂君門下士何難質萬千君前爲致
黃岡縣志 卷之三 詩 三九

說解甲便歸田賊怒不可遏君論自便便言窮益激厲髮指
目睛圓大罵死狗奴爾罪已通天卽予老秃翁何惜須臾延
頭可一刻斷氣常萬古鮮我也念疇昔五岳崩胸前骨鯁不
在朝死綏不在邊區區徒步士曾此一髮牽招魂豈江上淚
落如流泉

買山

官撫辰

何以見山深白雲路千曲何以謂高蹈瀑布濯吾足石頭半
空垂開口如相告見謂斯世人各美卽醜毒含章自高貴何
事明如玉聆此如蘭言嗒然驚幽獨

維摩堂過孝宣寺斬水劉中尊雲麓聞信卽至

文公軍旅日勤禮大顛師君今政事暇清晝只歌詩詩中有
禪意情境任參差以茲親我理驀爾過招提佛法無多子名
聞未有私見君繩祖武動我舊時思今古同且暮道岸無傍
歧相彼滄流水棠陰無倦時

自團風鎮沿江西行

凌義渠

未及涉江去迴環此眺聽涼秋涵野曠雲物何泠泠浪偃磯
初落風遲帆乍停芋田鋤後熟藍圃望中青挽罟依沙岸懸
帘截水亭斷葦生遠響叢芷發微馨日極俄傷晚千山不一
形霞光隱日脚青紫界蒼冥勞望會有極動者亦云寧吾行

黃岡縣志

卷之十

詩

四

適樂息催火出林垌

先奉常入祀雷陽旌忠名賢祠感頌四章

樊維甫

乾曜無終暄聖作乃物睹既渙匪比羣旋殄二五耦薄海復
昭回纍臣發幽蔀黽勉附前修肝蠶歆列俎攀冠雖讓肩躄
蘇或聯伍並受王明福實藉羣公剖

羣公敦懿好孤憤千載吐為善豈近名庶以刮前垢昔有雍
公孫咸秩十夫聚炎荒貌榮觀信公惜其羽熙朝會一與繼
此得再舉登高誠易招司直賴吾友

吾友直以諒宿昔同堂庶滄漸君子澤海濱故鄣魯忍飽探

鯤魚鄙溫歌兕虎悠悠閱世交生死隔修阻一聞記宗功橐
筆惟恐後生竹出公安海碑在峴首

生竹何精恍海碑豈陟岵自有龍鸞奮焉用牛馬走大道已
為公百神盡或舞先義雖菲薄於昭亦云補俊然仰棖栭頽
不蔽風雨衆正幸有託廣厦固不朽

遣懷

萬曰吉

凌晨勉櫛沐出門見輪蹄云是市闐門車馬常栖栖富貴非
可學安得強攀躋落花任天風隨分得高低所受有本限理
數何能齊聞見苟非是且得聽黃鸝

山中夢何綱卿

王一翥

黃岡縣志

卷之三

詩

望

籬穿暎斜月楓落餘枯井偕遊都邑倦訝度林阿永川霞黃
安塘幼同事黃安吳敦之先生寺鐘京國景密學有高騫遙仕無旋軫淪
悞多方嘆儒棄舌端省睡深酬斯論驚迴共層嶺肅風動哀
嗟先軌蹈難騁千古忖心中何代不堪忍

野田黃雀行寄魏雲菴

王一翥

儒者道不顯托名求神仙一日亂難逃千年壽豈鑄惟有開
村靜魏子忘華軒俗人不相師如病畏藥言黃雀野田中銜
泥戲丹鉛

赤壁送孫魯山行

王一翥

江漢滙湛處宜有僊人船默記與潛膺毫芒海市間往著固

塵遺前列亦依然生民曩屬意窮友今彙萃九辨保幹壽七
諫廣靈荃南詢剡施岡西凌磐確泉涓子每出沒江妃聰眇
圓洞壑邸華葉冬霜展妙觀是時一卮酒爲我洲渚言復驚
採樵貌不在廬山原雞黍隱士讐始徵薄俗難蕭影訴沉滯
素暉野月鮮

登寶石山

龔鼎孳

捫蘿叩蒼扃雨蹬積苔繡門射江潮濶湖帶錦屏右吳峯盡
入抱越嶠遠來就雉堞炫表裏鱗薨吐層構杉枯俯若薺
翳失橫岫鈴鐸旣風展金碧亦綠圍星崖延夕暉亂泉决
溜萃崒此浮屠拔起六橋秀往者頗相忽凭檻若襟袖及茲
黃岡縣志 卷之三 詩 望
足日到高深乃奇奏拭壁讀殘碑陵谷幾興仆滄海豈不廣
詎信桑疇茂

寓園卽事三首之一

杜濬

暫歸不得息復來叩園荆掃榻恣偃仰深綠怡我情假寐遂
成夢夢醒聞流鶯爲時已中伏宛作春曉聲奈何雀與烏努
力方爭鳴衆雀旣嘈雜羣鳥尤豪橫坐令好音阻側耳不分
明三歎推枕起仰視天宇行

題張號泉公廬墓馴虎遺事

萬爾昌 師二

漢史載歐子依墓結草室虎刳適奔獨襟覆得以逸感承仁
孝意趨望竟如暱月爲致一鹿孝子供俎實千載有張翁踵

事遙相匹虎亦夔其廬馴馴等郵勿此事餘十紀黃髮遞稱
迹龍負蠓蜨視德至隨波沒潮鱷肆吞啣投文遣以出驅使
奚能然茲理安可詰至性極昭格豈云同幻術其時諸賢詰
紀贊各鉅筆翁孫曰聚上表幽圖劄劄余也得寓目追誦齒
猶慄豈惟光家乘國史借芬苾誰續漢歐傳濡毫美無溢

問津河懷古二首

王士龍 水簾

江萍阻孔轍回馭經山阿涓涓澗底流悵然懷逝波駢倭周
道遲厥滄行露多青兕叫山壁元猿嘯谷蘿悼彼歲月邁道
阻且長何述精怯山霧晻暎滯雲窩停轡思東土一路山嵯
峩

黃岡縣志

卷之三

詩

聖

林暉耀夕霏光氣啓隅陬山川險阻經勇者誠足儔征車傷
行邁役車勤未休道旁蓑笠叟禾黍長田疇杳靄日氣佳沉
陰天風颭青蘿臥犬吠晴嵐栖鳥啾悵此素心侶攸懷各有
由嘆息津渚問千載今悠悠

問津雜咏

王士龍

生不逢堯禪飲牛從上流緬緬葵藿志慨想陟屠邱蒼藻章
我懷被襟濯春洲鳥聲變芳林坐聽隨啾啾朝曦東壁曙夕
霞西山稠往來問津上長歌狎澗鷗

其二

我田不十畝在彼問津東我屋兩三間傾欹不遮風八口

終歲空廩愧年豐
跛牂倚壁角
缺釜泣露中
幸有殘書筒
日開無塵封
悅兒耽句讀
稍稍義解通
少君老且勤
紡車聲蓬蓬
煮水迨其夜
笑飲青燈紅

國朝

冬春題文昌閣

劉子壯 克猷

冬春宜晏起
酣情享昏夢
初日喚我窗
破懶纔一動
人事豈能厭
遲之庶有中
神足自多爽
天閑志亦洞

同諸君聖安寺餞曹檢討

宜溥

朱彝尊 竹垞

載酒入古寺
柳林東湖頭
將以送遠人
豈惟恣讌遊
精廬金源舊
香乳塗白牛
二帝一宸妃
遺像堂中留
更聞王萬石
辭

黃岡縣志

卷之三

詩

四

榮返故邱傾城出
祖餞於此聚行輶
古來離別地
草木常先秋
火雷焚怪柏
霜葉鳴老楸
雖乏斷碣存
陳迹尚可求
曹子酒大戶
十榼飲不休
一朝忽言去
無以申綢繆
列席庭槐陰
日午風修修
窪匏截竹節
主客互勸酬
未知臨歧語
遠合古人
不坐从林鷗
集斜照
忽已流
並馬歸道南
明發期登舟
一帆挂楚澤
百尺臥竹樓
川涂日以遙
何以寫我愁
夢爲黃衣蝶
飛繞崢嶸洲

送陳舍人

大章

歸黃岡

朱彝尊 錫鬯

君姿玉山並
君詩白雪高
豈意采風人
力不及楚騷
策馬去京國
却佩腰間刀
深甕虎文鞞
短後茶色袍
但愁別須臾
何

用心鬱陶素業在黃岡潮田滿江臯烏雉三百尾種秫持作
醪暇搜耆舊文筆禿猩猩毫少年能著書此事亦足豪可時
涉夏澳共爾浮金舸

帶貞女陶足大

程啓朱

江臯有貞女明粧立素月靜意慕孤芳緬焉懷往烈十四對
流黃鳴機織秋夕媒氏何殷勤手持雙玉玦繫以蛺蝶羅紅
絲千萬結女生願有家襦袂自此纈詎意狂飈生山摧梁木
折梁木亦已零女蘿焉所適止水矢從夫百折心益決死義
葬死情不必曾頡頏再拜別慈親俯仰腸內裂魂魄今于歸
九原有安宅世人競鉛華聲容隨煙滅卓哉岳瀆英流輝映
黃岡縣志

卷之三

詩

聖

昔哲入夜起江濤今古聲悲咽

過問津河懷王生生孫素公孫斐臣

陳肇昌 扶昇

朝涉問津河微風飄霖霖解帶涼風亭停驂休我僕山徑舊
所經睠焉起遐矚磊砢栢十尋滃湧雲一谷古殿鬱嵯峨正
容瞻肅穆平生望道心晚歲徒鹿鹿念昔同懷人紆餘散遊
目坐石草芊芊經臺松謾設俯仰三十年歲月如轉轂緬想
竹溪遊悽斷山陽曲欲去復徘徊臨流空躑躅

黃州移寓白衣菴適風雨夜作

葉 封

頻年事行李復爲江上客奔走非夙情栖隣喜梵釋寒溪春
正殘風雨夜殊劇濛濛竹樹中飛泉赴危石枯坐闕長哦懷

古空陳迹書堂邈千秋寸陰嗟不惜凌晨渡江臯踟躕更塵
役拜揖苦澁旬僧齋始清夕俄然風雨生其勢如疇昔雖微
邱壑奇颯沓成幽僻是時羈旅心乃覺境曠適所念柴桑居
松菊烟仍碧曩夜嘗相思問予新句獲挑燈茲何爲身佳固
性癖妙理發高吟寡儔迴風格用媿忘年交論詩希莫逆

贈葉井叔

王士正 阮亭

作吏客伊洛門對嵩高山山色映終古客心長自閑朝看飛
鳥沒夕對孤雲還聞昔王子喬吹笙碧落間揮手駕白鶴一
往三千年至今緱山上逸響凌紫烟夫君有仙骨雲駕如可
攀游自憩嵐巔躡足升天關廬巖瀑布佳百丈闔瑋潏懸流
黃岡縣志 卷之三 詩 吳

熾冬雪密樾生夏寒何當蠟屐來與君蹋飛湍

曉望雨華山

孫錫蕃 斐臣

晨嵐浣初日巖陰載當戶風疎竹聲乾澗長泉流怒草荒偏
餘露木童不受斧煙動行人小蒼靜秋容古

安仁湖湖上

孫錫蕃 復菴

白白湖中水嫋嫋竿頭絲鯉魚不受釣素書來何時藻華開
寂寞炤我長相思

相思復相思相思有已時相思不相思相思無盡期日落四
山紅雲起四山悲四山此雲日起落何時須

遊西山寺望赤壁

孫錫蕃

寺隱翠微半城倚夕陽脚澹激發風榛蔽翳幽花萼日來莓
苔高江起芙蓉削曠懷嶺上雲寶鼎長年藥扁舟邀赤壁壘
鷺並孤鶴海門島南來天漢星秋落鳳凰不肯鳴羽毛非燕
雀松柏不改柯性情老邱壑論交慎所許古人重然諾

懷子雲念菴荆仙

奚祿貽

昔在亂離時猶得同栖酒氣岸凌五侯他人瞠乎後不惜酒
債多常恐墜厨柳落筆掃風霜珠玉時在口地下韜龍泉紫
花秀成土我歸芙蓉江浮雲知舊偶三傑合精光玉京逢善
友白虹吹萬城春花被稂莠去者杳層雲存者厭老醜安知
草間人自與風月厚莫自聞隣笛勞歌淚如瀏何處是相思

黃岡縣志

卷之三

詩

罍

枝上子規鳥

叶丁柳切

同萬師二別周峙鉉由西港入江至陽邏宿

汪國燦

九峯山松煙入秋化皎月連袂別良朋輕舟於此發谿邊送
別人舟行歌未歇湖濶浪花平乘舟如乘筏雙柳夾谿流菊
華時秘辭籬落挂漁罾渡之于倏忽日暮江流急萬帆爭飛
越勸客凌逆波舉棹心尤疏市肆倚山阿孤燈時明沒客窗
更對語殘醉尤勃勃

冬日魏篤臣見枉因登並埠山遠眺卽事

汪國燦

山水與幽人情事多寥廓相對不苟歡神理慎所託與子登
高峰四顧生慙怍暮壑栖賓鴻昏鴉四鳴躍何山不可登冥
賞恒虞略翹首測幽遐胸中具五嶽

代鶴南飛曲壽蘇小眉太守

王追騏

修翰翥北極翱翔指南隅憑高振清音流響聞天衢直扶雲
漢上長呼蓬萊徒霞明閩海夢月繞楚江圖凌霄俯塵壤凝
丹映冰壺軒舉復澹蕩新秋景物愉俛仰千歲松鳴和五雲
雛羽簇鳳鸞並仙家律呂殊戛然橫江聲蘇公興正娛

大士閣置酒遠眺還飲寶臣齋看月

顧景星 赤方

年少喜邊城愁心天上橫今朝對荒嶺一片暮雲平雲平復

黃岡縣志

卷之三

詩

吳

何處雉堞新無數翻疑城外山近是城內路城外復如何長
江空逝波風流赤壁盡秋壘白楊多徘徊不能住言向招提
去半壑起松風殘陽在高樹憑高矚衆峯願盼爲誰雄手揮
三雅杯目送雙飛鴻可憐秋夜清三五月華明王生知我意
對月洗金觥

紀曹子先死孝

胡琪

入火不能焚上世言其理屆茲理亦無所以孝子死君堂有
老親年近八十矣寒暑迭相侵病痿不能起君久廢煨燬
深伺動止是日親粗安料君竊自喜親老健慈悲命公歸
裏公堅不肯從側身傍床第孝親不干天仁義終成石

火忽來炎炎茅簷比兒告親急行親執不願能反揮兒急去
兒曰安有是痛哭前致辭哀哀且拜跪一念猛然生正性無
議擬衣被裏嚴親蹈火雄步履雖得出全身焦頭却委靡三
日老親亡七日君身毀哀痛事方殷謳歌聲正美同儕走司
鐸藉以惕人子倏忽十餘年尚有待國史空山霜雪中魂清
夢及此稱君爲死孝死孝復何嘗悵悵記前因補綴愜所以
斯理本中庸竊莫疑弔詭

團風鎮避風用少陵萬丈潭韻

宋 犖 牧仲

北風江上急濃陰忽如晦孤帆隨鷗鳥簸蕩洪濤內繫纜向
洲渚一水投煙靄咫尺見鄰舟笑兀柁樓大小船如蟻蝨絡

黃岡縣志

卷之三

詩

晃

繹兩岸對港深波復平陽氣浮澹瀨雪花遠近飛著地明殘
碎荒村盡掩扉漁翁不在外驚心列戍多到處懸旌布江樓
駐雄師聲名傳下瀨乾坤浩茫茫萍梗偕流輩百年境遇繁
適意誰能最緬懷川路紆顧景蓬窗礙悵然念去春遊賞欣
吳會

詠洗墨池圖

宋 犖

疇昔判黃州一官同泛梗江山樂清曠俯仰客懷永東坡流
墨池蕪沒無人境爬剔出神瀟一泓浮翠荇豈惟存舊跡兼
可逐清景好風澹蕩吹几席淪漣影幽人對如鵠甌香時豎
茗蛙口食墨魚

楚放池蛙食黑口黑

臆說堪笑屏別來三紀餘幾思駕

烟艇

東齋作

宋 榮

官衙類荒村高齋莽寥廓几席控江湖軒楹帶巖壑往往出
水音泠然座中作牆隔竹與蕉枝葉相參錯嚴霜旦夕來顏
色已非昨臨風步廣除顧念修名薄載咏素餐詩于焉發內
作

赤壁

張叔璵

昔年讀兩賦仙風衣帶襲此日拜先生餘徽尚洋溢巉崖歷
虎豹江山不可識道士歸何處耿耿填胸臆四顧轉蒼涼長
懷到壬戌

黃岡縣志

卷之三

詩

三

湖居五首

張仁照 長人

朝登赤壁山暮宿磯邊寺山雲自往還獨與幽人遇蕭蕭坡
叟心淒淒毛公思

赤壁磯下有毛寶放龜處

水向今時流石老前朝字湖

山昔已遷日月誰能志但聞山氣佳漁艇時搖翠城荒亦避
俗籬落鶯孤遂行李忽為家旦晚發深唱

平生誰志得坐臥見江山况復秋冬中竹樓已成灣平林兼
島嶼物色會相關衆人各有作羌余獨解顏余心誠自遙聊
復時閒閒

寶山雖不高當湖為日夕水落見漁梁光景胡歷歷呼兒採
怪石過甬山如滌始悟旅人懷形影出沙礫居民亦古初顧

盼生愉澤欣然已結隣
荻徑連疎迤日暮有鐘聲
古寺余夙音

夕陽浮野水漁舟始自歸
寒城挂衰柳竹氣亦微微
羈客愛明月閒情無所依
坦步入隣屋素髮坐漁磯
清霜豈不嚴所惜在裳衣
不見古賢心臨流知魚肥

昔我有良朋相邀洗墨池

何子安嘗邀遊東坡祠

池邊何楚楚雪照東

坡時今我寓林臯斗酒忽如遺
當年二客懷愴惻無人思
洞簫隔明月武昌亦在茲
仙人不可遇草石今參差

恭謁問津書院

陳大章 仲夔

去聖日以遠冥行類擿墮
嗶嗶鐘鼓聲所習非所志
恭惟問

黃岡縣志

卷之三

詩

五

津河傳是回車地麟洲昔創始
著書此築室天臺播遺風
講壇樹閔秘魁儒宿望尊
學子擔簦至當時諸老翁
稠疊資鼓吹道義溯淵源
公卿連項背坐令一畝宮
遙揭東林幟我行傍祠堂
循牆謹辟叫細草披蒙茸
古柏摩蒼翠延階眺修椽
升堂闕禮器惕息拜袞衣
彷彿瞻四氣東謁仲子祠
沮溺列配位前楹奉儒先
爵里如鱗次厥西宏仁堂
絃誦儼居肆想像昔人心
經營寓深意聖道日中天
有日皆得視寤寐卽羹牆
小大隨所識涓滴助海流
埃塵補嶽積登枝無捐本
培根竢其實敬恭鄒魯鄉
趨踰俎豆事古賢迄未亡
諸賢慎塗墜龜勉有同心
修舉期勿墜

謁韓魏公祠呈許蓼齋太守

陳大章

荒城秋氣合寒露百草滋緩策南郊道言尋魏公祠賢守美

為政修舉良在茲春草亭名餘結構書堂煥棖題惟公不世才

間出當明時堂堂柱天手變化無端倪景祐治平間呼吸定

嫌疑杓縣天北極孟覆地四維公神在宇內元氣浩淋漓黃

人每矜誇謂公實我私永嘉有遺集浪語非無稽宋薛季宣浪語集記

公在黃有靚女往來踰年言不涉私及去曰我屈原二女也公真德士異日當推此意以澤天下正直留民

秉精誠格神祇昔謁相州廟載哦閱古詩在定州叙述追典誥

圖繪儼鬚眉請得構妙手斧藻揚形儀錄公生平事附以琬

琰辭傳寫左右壁天宇爛虹霓乾坤多醜類忠一萬奸欺微

黃岡縣志 卷之三

詩

五

公豈有救英爽此昭垂今得拜遺像顧盼生怵悵風雨俾勿

壞殷薦謹常期匪惟慰邦人百世瞻師資

里中四賢詩

贈光祿少卿諡忠烈周公之訓

陳大章

周公戟鬚眉冷面骨高峙逡巡仕籍屯灑落詞翰美晚出崇

禎中合沓風塵起備兵濟南城萬騎森薄猗孤軍援路絕落

日戰鼓死同時張布政 鄧 糧 儲 馮 都 司 失 名畫守分寸咫公獨當

其南張髯劇嚙齒提戈憤一呼衝鋒斷雙髀烈哉三媵妾聯

袂赴井水悽惻太常誅稠疊尚方璽至今六十年舊蹟傳鄉

里事失野乘蒐時亡實錄紀我昔攬遺文纂言痛至髓癸亥 修通

志載公殉 難本末 嗣叨三館末大聲激起耳

聖朝無諱筆修明史有勿諱死事諸臣詔 淪胥固有以何以慰忠魂遺責 在青史

故孝廉王公一翥

龍性本難馴鳳羽實高舉偉故王孝廉清芬揚六字憶昔撰
公詩招拾得藏弄幽姿艷冰雪老力雕肺腑日無七子壇跡
掃竟陵軌叶於時東林微遺業紛咀茹落落布衣雄屹力相
撐拄慷慨嘉魚交正希悽咽臨川語千亂本起衣冠羣雄恣豺
虎草履兩都穿丹心一寸腐人嗤杞人愚我憐精衛苦長嘯
隱廬山成名笑廣武爽氣不可攀逸躅跡前古朗吟乞食篇

黃岡縣志

卷之三

詩

三

脉脉增酸楚

故大名副使魏公公韓

鉤黨終禍漢閣豎迄覆唐太阿一倒授白日慘無光惟茲有
明季事勢何披狂三朝實同貫失道潰隄防正人既殄滅國
亦隨之亡魏公秉清鑒憤世懷激昂置身危亂際進退特周
詳一麾行解綬歸臥松山陽季鷹有先見子美多慨慷每把
金石句大義何琳琅遺風溯高顧軼事徵左楊孤節屹萬仞
逸氣凌穹蒼兒童識舊德松柏表新岡九原不可作湖水日
洋洋

故孝廉萬公爾昌

誰謂子雲元劇秦甚謠諑誰謂阮公狂
勃進何難
四方少小慕奇卓頗交隱側徒矢口在巖壑朝爲泛渚鷗暮
作乘軒鶴迴首西山薇大笑絕冠索有美萬夫子聲名實噴
薄世局幾滄桑雄心甘寂寞偕隱日初平
退修先生經史坐揚榰
胸次無拘牽篇章得灑落高尚五十年饑腸厭藜藿前歲升
公堂神明尚矍鑠頃來拜公墓荒草走狐貉服膺甲子詩痛
哭西堂作悵望武湖濱寒雲莽寥廓

舟過團洲懷鄭方南

陳大章

荒江盪夕陰秋色澹無豫沙洲昔未沉千室魚鱗聚故人休
沐歸吟釣有遺處結廬近何之四顧空雲樹廉吏亦可爲棲

黃岡縣志

卷之三

詩

五

泊隨所遇遙知高世心獨與古人晤閒歌紫芝篇或咏猗蘭
句堦前戲小同膝上坐文度適意且逍遙搔首各遲暮慷慨
平生言含情未能去

鸚鵡洲

十五歲作

陳大華

西嶽

漢祚日已非志士憤不已褊心固其常英氣亦何偉不見大
小兒捐生同一理長嘯俯大江日暮酸風起

夜泛赤壁

張光壁

斗符

磯上西蜀人磯下西蜀水蜀水三峽來蜀人不再矣小艇放
漁歌擊節中流駛此夕非壬戌渺渺烟波裏

水溢決堤

靖道讓

果園

澤國苦沮洳築堤以爲衛長夏雨連朝頓成江海勢頗疑古
女媧補天留空際致令蜿蜒堤嚙缺如睥睨沉竈跳井蛙四
野無涯漑嘆息此方民水災被連歲去年决程圩平陸成川
迹方圩今又圯蟻穴不可閉三春原野閒百草拔根蒂庶幾
麥有秋盼望欲决背豈知秀油油徒供魚蝦憇河伯無乃忍
胡爲此大戾眼看鳩鵲形昏墊絕生計緬想九年潦何以在
帝世

冬晴獨登覽勝亭舊址

在府城北

彭士商

甃銀

雅不戀遊山忽忽逢興會此興曷從生問心殊憤憤風和天
日暖林巒與酬對牛羊俱在牧上下鳶魚隊佳景殫風人閉

黃岡縣志

卷之三

詩

五

戶非所貴况值霜嚴時而與春光類登山一凝眸遐想入天
際境迴理無睽人孤道逾費遠水明深淙膚雲賑饑胃安卑
聽官評孰幽絕內悔行藏適然耳豈曰甘放廢逝將攜雲水
遺我同學輩

冬晴野眺憇大士閣

郡城北覽勝亭下

彭士商

夜聽鐘聲乾晨興發幽思同遊約不渝健步鄙車騎迤邐城
北隅崇岡邈然至山石若携蒲山靈信多智聞昔東坡翁惟
石尤標致買白僮監手所費但餅餌我圖獵取之不得其一
二茲念亦齟齬何况名與利下山憇僧寮酒榼詢童稚斟酌
不辭頻敲推良已醉霜葉留餘青醅顏染其翠亭午風更和

疑是春光麗石隱與吏隱地殊心豈異緬昔供石人胸臆無
沾滯

呂一石素遺余王補菴詩

彭士商

少時癖咏吟老不廢毛穎選詩聊企之初唐亦幾幸延之體
膺哉康樂獨清迴若夫陳正字廣大而淵永曲江抒忠蓋豈
屑才華逞奈何浮薄士舍神而繪影影隨光轉移不復有實
境先輩王補菴風騷之袖領遭遇亂離時執節殊森挺國恤
思難忘家禍言逾硬桑柔多沉愴小宛匪虛警或苦誦其詩
如霜凝雪冷豈知陶庾後遺山亦足鼎滯理留古情新機開
衆瑩友人石素翁持此一相訂吾久嗜此詩此詩通溟滓

黃岡縣志

卷之三

詩

五

搆小樓成呂石素畫卷阿之九章賦此奉酬

王道明 雙崎

舊宅兩峙南新規讀書屋趾基倚坡陀締搆思古樸礎秋瓦鍛
頑石梁欂輦巖木無瓦且縛茅有垣惟編竹最喜四山環崢
嶸而萃嶽牖卑不能納佳氣勞瞻矚汲版駕作樓勢敵諸峯
矗豈曰壯吾居聊以暢幽獨感君寫生手遺我雙鸞鷲九苞
奇采驚對舞神襟淑初日上碧梧如聞鳴足足德輝胡覽焉
來下此林麓

盛世太和翔四靈以爲畜凡稱藹吉多許聽雌雄六附翼雖
未期題門詎貽辱憑闌展圖看孤情結遙目願言借素交豐

羽文章勗

十月既望攜二子忠敬游赤壁以仰見明月為韻四首

陳浩紫淵

坡公舊游處千載餘清賞怪石劈丹砂懸崖絕土壤大江走
其下靜夜發奇響對岸武昌山寒烟且林莽我攜二子來沿
岸蕩雙槩卮酒酌公祠高山心所仰

赤壁在黃州說者異聞見豈知博達人初不泥史傳指揮周
郎軍來與孟德戰公從壁上觀奮擊駭雷電一聲孤鶴鳴驚
落白羽扇四顧寂無人江光皎如練

江風如此清江月如此明惟公不可見使我心屏營我欲乘

黃岡縣志

卷之三

詩

七

此月冷然御風行左攜羨門子右挹安期生飛渡紫沂海尋
公白玉京握手一歡笑用慰千載情

千載復幾時往來人代閱今人與古人共此一輪月造物無
盡藏江山此清絕更因文字奇不逐雲煙滅長嘯激松風豪
吟灑蘭雪留與後來人捫苔摹斷碣

晚步聞鐘

王養愚可亭

日夕無所營徐步遣幽興白雲淡遠岑秋草萋前徑隔水暮
鐘鳴悠然入清聽

醉吟篇

王養愚

無錢一身安有酒百事足既醉復長吟倚門歌一曲不敢妄

求榮但期常不辱不敢自鳴高但期常不俗不辱與不俗便
了半生局自歌還自罷夕陽春草綠

戊戌立春大雪飴諸友雪堂

楊庚

黃州來五年光陰一瞬過回首四年前早潦妨農課望雪復
望春時厯百穀播雪倘先春來豐年可預賀宿麥滋培多蟲
孽藉摧挫何止灞橋吟詎羨袁安臥坡翁構堂成繪壁光映
座我爲翁鄉人希蹤勉勿惰今年立春雪連日飛花大頭使
雪中人都向春中坐一片冰壺心不着纖埃泥我旣歌陽春
願聽白雪和

題俞少府鴻甫昌烈本來面目圖

王德新

黃岡縣志

卷之三

詩

五

有客慰通泉劍氣飛昆治有吏沉封邱狂歌孟諸野彼皆負
奇姿豈沒塵埃下少府燕趙豪修幹顏渥赭竭來役齊安霞
軒驚廣廈見面已見心磊落英多者况復妙衆藝而能掩羣
雅忽現息影身旨向瞿曇假邱壑了無著笠屐亦云捨廬山
是耶非欲認空捉把噫嘻我知之精神藏龍馬以靜爲動根
變化須臾也得路長風生得水時霖瀉他人類榮名工費良

金寫

